

天岳山館文鈔

天岳山館文鈔卷二十一

贈中議大夫先兄煙閣墓誌銘

距祖宅二里許地曰南竹坡有邱巋然迺吾煙閣兄墓也兄病革
遺言必葬是越數年遷葬祖宅後山又六年乃返葬視舊穴進尺
許後四年將立墓碑察之壤甚吉乃礮石爲銘納諸幽兄諱元勳
字黼猷號煙閣行二曾祖錦林公諱自芳邑諸生 贈光祿大夫
祖星垣公諱家庚從九品職 贈秩如曾祖父希宋公諱傳郊
贈中議大夫前母喻繼吳又繼丁皆贈淑人兄丁淑人出也二歲
失母三歲而孤大母徐太夫人撫以成立時吾母來歸拊之如子
兄亦母事之生有奇稟幼跼弛不羈於匠作雕繪縫紉范金鏤石

諸事皆不學以能每就塾口誦而手別有營塾師倍所業以困之不能難會村伶有傀儡之戲兄往觀得其法做製十餘具衣皆綾帛手足旋轉自如見者咤異吾母疑綾帛何自來發笥眡之則大父母賓祭之服衣裏皆被裁割吾母亦失羅巾二召責之兄笑曰凡吾所裁綴皆裏之上半截非表也服之仍無害大父母笑置之弗責也又嘗造小舟浮叻澮開帆櫓畢具木偶望如生年十七始折節讀書爲文下筆立就工詩賦從伯父遜吾先生游謂自先生外無足當北面者伯父好畫山水卽亦從之畫兄天才縱逸善詠諧所至傾其座人村農賃僕聞其言皆意滿樂爲之用先伯祖覺臣公八十初度宴賓凡七日故事治筵讌牢醴及迎送事部署非

數人不辦。兄一手綜理有餘暇。人莫測所以。他昏喪事皆然。然亦以是積勞得咯血疾。高會以上墓碑多未立。兄建議劃公產所入。居積之。越五年三世墓碣皆修舉。未冠出應試。文人穀矣。忽以微疵擯。兄念大父母春秋高。懼不及見。已之克有立也。私爲文禱神。願減算益兩老人壽。自是益悴於學。購舊書數千卷。手治之。完整如新。听夕讀弗輟。道光甲午大母見背。兄毀甚。病益劇。明年養疴獅巖山寺。余相隨讀書。兄督余課。嚴不少假詞色。余雖幼。知兄之厚我也。三月兒歸。自知弗起。見大父則絮泣。閏六月四日卒。年二十有三。兄天性最篤。精計畫料事多奇。中歿時遜吾伯父館易州。夢兄至談笑如平生。曰吾死矣。異而識之。日月皆不爽。獅巖寺僧

亦夢兄乘輿至拜辭佛座前翼日聞兄訃烏虜死有所歸理固有不
可誣者邪兄娶吳氏以苦節著同治元年得 旨旌尋卒子積
經兄卒時裁二歲後從戎案功 賞戴孔雀翎以知州發廣東卽
用補德慶州加運同銜嗣孫厚英光祿寺署正女孫二銘曰
才大而奇未竟厥施鬱此瑰璋埋藏地底若神劍之在淵化白虹
其亘天斯邱孔樂躬自相度幽宮是作不於其身必於其子孫書
以諗後之人

封徵仕郎易公墓誌銘

光緒二年四月丙戌 覃恩敕封徵仕郎易公漢槎考終里第春
秋六十有一子道南時官江華學訓導聞訃星奔葬公於杏花岡
之原辰首戌趾屬元度銘其幽案狀公諱光玉字欽明漢槎其別
字也曾祖某祖高文國子生父榮華 地贈徵仕郎母某氏 贈
孺人公兄弟四長曰 贈徵仕郎光煥次光燦出嗣世父三候選
州吏目光增出嗣季父公以光煥子爲後卽道南也公幼警穎好
讀書出語驚其長老踰冠失怙恃昆弟析居以治生爲亟不應有
司試援例爲從九品職而舉子業固未棄也亡何長兄夫婦相繼
卒遺孤三公復與同爨課耕讀俾皆成立有家其課道南也每發

天邑山會文金卷二
一題輒先爲程文示以則著有石韞堂課草百餘篇道南弱冠補諸生同治丁卯舉鄉試及之官江華請迎養公詔之曰吾樂與故鄉父老遊爾母尤體孱遠涉爾但能舉其職吾願慰矣吾畱家課諸孫足自樂也明年夏公忽感微疾自知不起端坐而逝公竺於內行嘗兩督修家廟兩纂族譜性好施與粥餒者絮凍者楷殍者終其身弗勸縣人有大工役率解囊爲眾先閭左身角訟得片言立解粵寇踞崇通治團防尤力北界固圍公與有勞焉娶某氏封孺人女子一適從九品李元榮孫五人女孫二人曾孫一人其卒也井里嗟惜之道南尤以未躬視含殮爲憾烏虜因仕遠親實從親之令抑親心之所許也其又何謙焉銘以塞其悲銘曰

猗嗟公兮邦之傑也。劬躬燼後心如結也。世突梯而哢訾公弗屑也。掖困噓枯至誠惻怛也。有子而才賢書列也。送子之官萬世之別也。有宰者邱樹穹碣也。我銘以貞之字不滅也。

五品銜候選內閣中書熊雨臚先生墓誌銘

道咸中大湖以南以詩名天下者推長沙熊雨臚先生先生負異稟兼工古文辭少受知會稽吳梅梁侍郎中丞吏議得屏人事壹意爲詩歌天殆以詩人位置先生俾竭其才以雄視一世晚躋大耋解組歸優游洞壑十餘年歸然魯靈光殿越南使臣特購其詩集以去先生詩益大昌云先生諱少牧字書年雨臚其自號也先世自江西豐城遷長沙曾祖國猷妣馮氏祖光文 贈奉政大夫妣彭氏以節孝 旌門 贈宜人考華朝 贈階如其祖妣黎氏 贈宜人先生昆弟三次居仲七歲喪父家中落授徒以供養踰冠爲諸生有名吳侍郎方督湖南糧儲發策以詩賦試士得先生

作大驚署超超等待之以國士道光十一年充優貢生試成均屢
甲其儕長白文端公文慶爲祭酒尤激賞之諸公貴人及諸名下
士多從其游文酒無虛日亦頗以是取忌於時十五年舉順天試
故事南人不得實解首先生名第二衷然爲南數省魁名益振明
年試禮部入彀矣已而置乙選又四年文端公典江南試適遭疾
私引先生襄校試卷先生重違知已冒禁從之比還朝言者劾文
端先生下請室除名放歸論者謂典試與督學一也學政例許辟
幕友且以其姓名上聞典試獨弗許網亦少密焉然先生意豁
如也勞文毅公崇光備兵冀寧招先生作晉游冒雪渡黃河歷覽
陶唐虞夏故都胷中抑塞磊落不平之氣一發之於詩其詩益奇

以肆居四年歸亡何粵寇起犯長沙不克自鄂而皖而吳湖南治
援軍庫如洗巡撫駱文忠公秉章夙器先生檄令走江西乞餉先
生慷慨呼庚癸聞者感動得餉金歸適濟乏絕得旨開復原資

會創建求忠書院聘先生主講席士喜得師橫舍至不能容部檄
至截取知縣改就藍山學訓導至則江西賊來犯閩縣城先生佐
主者嬰守二十餘晝夜圍解詔加五品銜以內閣中書選用逾

年請告歸年七十矣所居洞泉草堂饒花蒔之勝先生與其弟聯
牀夜話選選雞再號始就睡而問字乞詩文者接踵於門所著讀
書延年堂集詩三十卷文十卷駢體文二卷賦詞各一卷試律四
卷晚編續集文二卷詩十二卷並行於世性竺孝友梁氏姊嫠而

龔先生迎養於家嘗倡建支祠立規制里中諸義舉竭慮成之有雀鼠訟力剖其曲直然未嘗以辭色加人先生考終於光緒三年十二月十一日壽八十有四配黃氏有婦德事王姑姑並以孝聞慈儉好施一紡車非病不輟衣非數澣緝弗易先先生七年卒當同治十年正月二十五日壽八十有一子三傳笏先卒次傳筠次元曜廩生同治三年舉人孫五女孫三曾孫五曾女孫三先生與黃宜人合葬瀉化都九甲霄霞衝之迴龍山枕已嚮亥孤元曜來請銘元度少喜讀先生之詩嘗序其續集又嘗纂先正事略先生詩有云笑問昌江編事略他年得列此翁不烏庠命之矣敢以不文辭銘曰

澧蘭沅芷馨且潔。屈宋餘芳流未歇。洞泉先生湘之傑。以詩名家韻高絕。有煒厥配歸同穴。滔滔千載去如瞥。銘以貞之字不滅。

敕贈登仕郎例晉武德騎尉外祖喻公墓誌銘

元度少孤年九歲始隨母太夫人謁外祖父母時道光己丑歲又二十八年當咸豐丙辰三月某日外祖考終元度方治軍江西不獲視含殮又二十三年當光緒戊寅舅氏兄弟修墓道命元度撰誌銘補納諸幽外祖諱古雋字秩常平江喻氏曾祖達五祖聘君父清治皆國子生母余氏有子二公其長也少穎特讀書能文紉於試弟婦某氏性乖整多諄語以已一子而公五子也力求析筋居公曰吾志也吾食指繁豈以累若哉既別籍而譙讓聲不止外祖母楊孺人體公意置勿與校人皆以爲難公亦以婚嫁事日繁家中落會外祖母卒遂爲五子異居公少好飲至是益隱於酒視

世事升沈得喪壹不入其懷。客至無賢愚，輒問能飲否。能必飲，以酒醉則酣嬉淋漓。雖朝炊不繼，晏如也。性尤慈厚，務損己以益於人。人有急，輒推解應之而已。或無卒歲資，戚里誡公食。公每不飽，歸必補具飯。問故，則曰：貧家偶讌，客童稚爭望餽餘，吾不忍恣啖也。其曲體人情類此。祖宅踰二百年，五房共居之。公思其轉鬻也，建議立爲支祖祠，自蠲十餘貫爲倡，皆自節衣縮食來也。子慶仁從九品銜，慶義五品軍職，慶禮卽選巡檢，慶智卽選從九品，慶信從九品銜。公以慶禮職，貤贈登仕郎。又以孫翰藩候補守備例，晉武德騎尉。女一卽吾母。道光初，先大夫魁郡學，公喜甚。明年不祿，公則大慟。元度六歲時，歲除作書乞公惠爆竹。公賞異之，侑以

二絕句其後注學籍忝鄉書公皆來視先大父大父聞公至輒倒屣迎惟恐其去晚年吾母迎公至家課孫及孫女輩時孫尚幼不任讀特爲奉養計耳居二年公辭去明年卒壽七十有六孫十人振鶴府學廩生能以學行自奮公皆不及見矣葬某山之原銘曰人貌而天全爲酒人以全其天世目爲飲中仙公益有託而逃焉仁心爲質有蘊弗宣元氣鬱積而磅礴償以後澤之綿延我其所自出循母命以志斯阡昭潛德於萬斯年

贈修職郎國子生毛公墓誌銘

光緒四年夏毛君朝杰以其太公夫婦狀屬元度銘其幽窆元度與朝杰少同學具悉其家世敢以不文辭案公諱順祁字雲翥一字步衢平江人曾祖仲相祖存用父璞齋公諱珂妣鍾氏本生父華巖公諱和玉本生妣李氏璞齋無子華巖以次子後之卽公也公事親能先意承志尤竺於昆弟析爨時讓肥而取瘠曰吾所安也少讀書能文試郡邑列前茅屢擯於學使援例爲國子生不事進取而壹意課其子若孫每訓朝杰曰德器本也文藝末也士不當循末而忘本朝杰有學行以貢入雍其子繼澄亦注學籍皆公之教也公性冲挹與世無爭競人服其長者亦莫與爲難嘗出

行阡陌間有偷兒竊其薪蒸公以葵扇掩面急過之既歸復自尤曰今日悔不當往彼知我目擊之何以自安邪咸豐初毛氏築修族譜公董其成與同事約曰族無大宗祠闕典也吾屬毋受薪貲以擗節所餘爲建祠舉本可乎眾皆曰諾及公易簀猶誠朝杰曰祠事未竟爾其力圖之越二年祠成朝杰至今肩其任遵遺命也烏虜公可爲知本務者歟公終於咸豐八年十二月十一日壽六十有二葬金窩江坤首艮趾厥配張孺人祔焉孺人性貞靜事舅姑惟謹見戚里有急輒畢力飲之不繼則轉謀諸子姓每燕談輒舉某人爲善得美報其惡者報亦如之又言人果存心貧困不足憂也否則目前之榮顯必不足恃聞者多化於善里俗溺女孺人

每曲止之。或躬造其家。繼以歸所全活四十餘人。其終也無疾而逝。人以爲善德所致云。孺人終光緒二年六月初十日。壽七十有四。子八人。長卽朝杰。絲歲貢。就職訓導。次曰某某等。孫十二人。曾孫四人。銘曰。

有宋君子。竹間先生。傳紫陽學。厥諱友誠。公其族裔。能楸厥聲。一經世守。自葺湖亭。惟以澤躬。不希世榮。守雌尙黑。事親從兄。裁以史法。宜紀獨行。粵有良匹。禮法垂型。訓子及孫。不隕令名。有歸者邱鬱鬱。佳城九京。可作。祇此鏤銘。

封奉直大夫候選巡檢厚齋楊公墓誌銘

同治十二年癸酉歲厚齋楊公就養於其仲子黃平州吏目志皋任所時志皋已擢五品銜畱黔補用知縣明年甲戌恭遇

覃恩慶典封公爲奉直大夫贈配鍾氏爲宜人是年十月十

日公考終官署享年六十有五尋扶匱歸葬姜源之桂花壠庚首甲趾越光緒四年戊寅志皋以知縣入都引見恭頌制誥二

軸請假歸里修墓道焚黃祭告如典禮遂丐銘公墓將補掩諸幽

且曰遺命也公嘗從容言他日儻得李君銘吾墓卽顯揚之一端矣烏虜其忍不銘謹案公諱履豐字諧弼號厚齋先世自江西遷

平會祖某祖某父某贈奉直大夫妣梁氏贈宜人公於昆仲

四人序居季幼聰慧敏於讀弱冠患咯血疾遂廢學先是贈公以懋遷往來湘漢間至是挈公自隨公力佐佑之所殖貨利輒倍蓰業日起既以贈公老請毋再出而自與叔兄往紀其事未數月贈公卒於家人以謂孝思所感云公年踰三十卽喪偶誓不再娶贈公卒後罷遠遊鬪肆於市晨出暮歸便將母且拊畜子女也咸豐初余治兵防剿江西公率兄子子從戎遇事不避艱險以功敘卽選巡檢丁巳司宜黃釐金稅局初在事者多苛暴商民屢聞未幾淪於賊及是眾欲踵前轍公持不可所擬科則減舊章三之一至今以爲法後從援浙江司軍餉同事以公方正多給數十金僞弗知也者冀以嘗公公立白之眾益稱爲君子志舉之官

黃平也。瀕行公誠之曰：秩雖卑，不可以己之名節徇上官之喜怒。尤不可以百姓之肢體恣己之喜怒。其就養僅一歲，臨終誠志舉曰：吾一生忠厚，自反生平，惟某歲在市買茶，晨起訪友，遇五人肩茶至，彼不知價已驟昂，余賄以舊值，獲利倍。至今以爲悔。爾曹戒之。烏虜觀公所自悔，乃今人所自謂無傷。且有什伯千萬於此者。而公較然不欺，是可以概公生平矣。公二子：長德全，先卒。次卽志，舉女一。適余從子廣東德慶州知州積經孫三人，女孫四人。銘曰。

其智圓其行方，始而士旣而商。尋楸勦於戎行，有子而才。筮仕黔，量就潔白之養，遠襄羊乎帝鄉。逢國大慶，綸綉褒揚。我銘紀

實斷不作乎中郎

候選知府胡君珏軒墓誌銘

君諱裴翼字篤忱一字珏軒益陽人於 贈光祿大夫諱多吉

贈一品夫人楊氏爲會孫 贈光祿大夫縣學生崇祀鄉賢諱顯

韶 贈一品夫人湯氏爲孫 贈光祿大夫府學生諱達灝 贈

一品夫人彭氏爲子而其本生父母則曰 封光祿大夫道光乙

未副榜諱達潛 封一品夫人陳氏副貢公有子四君其季也年

十一出爲府學公後世父諱達源 賜進士及第官少詹事少詹

之子諱林翼絲編修官湖北巡撫 贈總督子諡文忠爲時名臣

君胚胎前光束修勵節事親孝未嘗一昔違左右喪葬皆盡禮逾

冠爲縣學生文忠公無子君生長子子勛卽以後之咸豐十一年

文忠薨於位君悉力捭搆諸務時本生父母篤老本生兄保翼以縣學生官仁懷縣知縣卒於黔叔兄杏翼繼卒君先意承志俾忘其憂焉先是少詹公著弟子箴言文忠因建箴言書院買田聚書以教邑子又建紫筠家塾甫就緒而文忠薨君皆力肩其任君少勵文行作日記以自繩削應鄉舉屢膺房考官之薦不遇屬事會盤錯不能竟所學繇附貢生游保候選知府胡氏既爲甲族君之才復稱其門望凡縣境國防捐輸督銷淮鹽局務及重建縣署考棚魁星閣育嬰堂救生局諸公事皆推君領袖下及閭左爭訟亦質成於君莫不各滿其意以去遇窳艱者輒傾囊以飲蓋二十餘年於茲矣同治十年丁本生父憂越三年彭太夫人卒君皆哀毀

逾節遂得頭暈之疾光緒元年本生母陳太夫人卒君疾益不支矣君卒於光緒四年六月初三日年四十有四娶陳氏誥封恭

人子八長子勛出爲文忠後 欽賞舉人世襲三等男次慶龍附

貢生五品銜候選知縣次慶雲慶霖慶祺慶伊其曰慶麟慶光者早殤女四婚嫁皆士族葬縣境某山之陽其孤來徵銘烏虜道光己亥庚子間少詹公主城南講席元度及其門越咸豐甲寅始識文忠公於軍中謬蒙推轂有知己之雅其時副貢公以治軍餉故省曾文正公於舟次獲見顏色焉陳太夫人之卒也君屬元度銘其藏今幾何時復銘君之隧道豈不悲哉爰爲之銘曰

維潭之益在資江溪名族曰胡世載其美甲第封圻旂常是紀君

亢其宗。令聞亶亶。孝乎惟孝。友于昆弟。乃命主鬯。出爲兄子。以義割恩。教誨穀似。爲政于家。仁及井里。青綬銀印。彈冠可俟。胡天不弔。年逾強仕。高衢待騁。蹶然以止。修短曷常。有子不死。銘以章之。敢告惇史。

黃君天階墓誌銘

維黃氏世居平江東郭族懋且蕃爲邑之華胄君諱崇道字天階於 誥贈武翼都尉諱修教 誥贈淑人某氏爲曾孫 誥贈武翼都尉諱德某 誥贈淑人某氏爲孫 誥贈武翼都尉都司銜加一級諱益謙 誥封淑人曾氏爲仲子少讀書了大義不屑屑事章句援例爲州同知家故素封泊然名利場無子弟之過性坦中任天而動視時俗罕撓其慮或孤行入市肆中命酒獨酌意充然自得也同治十二年閏六月某甲子以疾卒年五十有三娶鄭氏子一曰新志國子生女二長適凌某次適皮某並國子生孫一葬長冲陳家壠古林園乾首巽趾匝所居三里許銘曰

魯山之左汨水環流儲祥毓粹樂哉斯邱君世厥居倚小天岳歌
斯哭斯生死允託其全其歸其藏攸宜銘昭其懿後世之貽

敕授修職郎贈奉政大夫東安縣學訓導張公墓誌銘

公諱瓚昭原名寶昭字絢珊號璞園晚號斗峯世居平江縣南門
曾祖諱禮行縣學生妣氏彭 旌表節孝祖諱樂正國子生父諱
光漢國子生 贈修職郎妣氏江 贈孺人贈公由縣南甲三遷
西鄉英集里生子三伯質昭仲賞昭皆縣學生季郎公也幼沈厚
有至性篤信好學未冠入縣學甲其儕嘉慶辛酉優貢道光丁亥
充鑲紅旗官學教習辛卯官東安縣學訓導舉乙未 恩科鄉試
第五三赴禮部試不第辛丑去官公受學於湘潭羅慎齋鴻臚穿
穴六經以稽古明道自任客都門久出蒲城王文恪蕭山湯文端
兩相國之門與安化陶文毅道州何文安諸公交以道義相切劘

師友淵源相期爲經世之學。阨於位窮經詁義排習說標正解羣
說創獲而確不可易。似漢以前儒者出也。著有經筭質疑易義原
則書義原古禹貢天文分野地輿說詩義原思楚陵述畧東安公
牘斗岸文集行世。嘗友教四方。注弟子籍者數百人。在東安訓迪
多士。尚穠皆來學。土豪蔣述之父子列庠序。糾羣匪嚮私。嚙橫行
郡邑。公誠不校。牒大府黜之。蔣多方搆陷。大吏不察。坐休官。後十
年賊圍桂林。蔣集黨響應。攻東安。事敗。伏誅。人服公先覺焉。又嘗
建議開長沙城外渠。巡撫吳公允行之。不果。逮賊圍長沙。當事始
思其言。公平居好言天下事。噤不得施設。官罷。以滇督林文忠公
夙相知。走謁之。文忠慨然曰。孤掌難鳴。予亦病且歸矣。公發憤入

都上封事

上省覽放歸公以誠未達志未申再上封事眾懼犯不測
上再宥之放歸乘驛至廣平之七里店遽以病卒公之忠也

皇之仁也而奄然道路命也夫公娶童孺人國子生道明女內助
有賢德以子貴封宜人子六轅遠廩膳生冊遠輯遠出繼伯氏爲
嗣輪遠岳齡廩膳生以禦寇功繇訓導晉知縣加五品銜女一嫁
六品銜署長沙府教授余澤榘孫六人孫女皆適士族曾孫四人
公卒於道光二十九年閏四月二十二日春秋七十有七岳齡星
奔扶柩歸里以咸豐元年十月二十日卜葬公於楊梅山之麓地
濱昌水斗灘下公夙釣游處也岳齡秩五品例得贈公如其階乃

於六年冬十月十九日伐石表墓先郵書章門請誌其幽元度從
戎無暑刻暇以先人從受學淵源所自弗敢辭謹按狀述其梗概
如右公之懿行播鄉里可弗詳銘曰

山叢叢水溶溶有邱焉枕乎中聚六經之精液亘千百年而燦爲
長虹望氣者知爲先生之幽宮也

封資政大夫州同知銜黃公墓誌銘

公諱祖翰字建屏別字文溪連城黃氏曾祖長祉國子生饒於貴
好行其德祖宗櫛國子生考集梧縣學生以公正爲鄉祭酒兩世
並以孫其華貴 誥贈資政大夫祖妣李氏妣童氏並 贈夫人
公兄弟三次居仲年十七棄儒服賈客湖南之常德時伯兄蚤世
遺孤三嫂氏請析筋公擬俟居積稍贏爲兄子立恆產乃析居而
時會屯蹙力不赴其心又方僑常郡其家已別籍異財公止之不
及則太息曰他日稍饒裕吾視吾兄子必如未異居也公生平篤
內行又以信義爲儕輩所倚修業而息之日隆隆起越十餘年家
具均素封矣公父母旣以壽終三子尙幼賴厥配李夫人及季弟

祖凌協理家事經畫井井公援例得州同知職亟出重金異兄子俾專貨殖亡何以折閱耗仍厚給之且爲諸子納貲齒薦紳成初志也公絲勤力起家自奉約甚願好爲利濟事芥千金無恡色鄉鄰有爭訟得一言立解咸豐丁巳戊午間粵盜蹂閩歲大歉子遭困甚公傾囷舖之貸不取息親舊不責償所全活亡算族故有大宗祠公始蠲田供祀事又以其餘力攸修書院祠廟會館暨義冢義倉諸善舉獨力建橋三皆買田爲善後計未嘗勒石署名入尤以爲難公之祖考並葬青竹山距所居里許晚年日必登壘攀宰木索息而歸光緒四年三月十六日返自先塋及門而踏遂病痰厥以十八日考終壽七十有八夫人爲同縣文學李公士玳次女

事舅姑孝姑疾籲天乞身代喪祭皆盡禮公遠客沅湘得無憂內
顧夫人力也子其章布政司理問加五品銜次其華知府銜湖南
補用同知加六秩封公爲資政大夫李爲夫人次其祥候選知
縣女適國子生陳信怡孫十人女孫五人曾孫二人卽以其年五
月朔葬清流縣北陽塘墟十字路之南山坐戌向辰夫人少公三
歲今健在公遺命百歲後必以夫人合祔禮也其孤具狀來請銘
乃銘曰

有焯封公闔之賢兮奮跡朗州隱一廛兮嗜義若渴其天全兮有
子而才建旌旃兮爲龍爲光命自天兮麀壽考終侶偃佺兮有冽
泉兮有曠阡兮有銘鐫兮將壽諸萬億年兮

旌表節孝 封太恭人章母易太恭人墓誌銘

同治八年五月二十三日

旌表節孝 誥封太恭人章母易太恭人考終於平江學署之內
寢越明年子時瑞以狀來徵銘其狀曰吾母姓易氏湘潭人年十
八事先君 贈朝議公爲筮室時祖妣馬太恭人在堂吾母與嫡
母孫太恭人事之謹能先意承志每侍膳母必手調以進婢媪效
之皆弗愜大母晚得喘疾恆竟夕不寐母侍側不解衣帶命之退
則偃息伏屏屢聞轉側聲輒起入在視大母嘗顧嘆曰若苦矣
他日當得佳兒佳婦以報若也先君中歲亦善病母侍疾彌謹吾
家自浙遷善化習名法家言先君客諸侯年逾四十初舉一子殤

感愴成疾立季父子應塗爲後道光壬午不孝始生生十二日先君卽棄養母矢身殉勺飲不入口家人曉以死節身撫孤難乃勉爲其難不孝幼多病每危篤輒繞室環走泣籲天曰兒父宅心制行宜有後兒不活卽未亡人與同盡耳不孝旣就塾母督之嚴孫太恭人憐其孱令少寬假持不可吾母事孫太恭人二十年無纖芥迂惟教子必行其志每斷斷相持卽彼此相嚮哭不孝亦哭旁觀皆泣下莫能進一辭至今思之絕痛也不孝未冠爲諸生娶周氏甚賢母喜曰馬太恭人謂當得佳婦其在斯乎亡何周卒母感慟累年歲甲辰及丙午不孝兩副鄉舉戊午授平江教諭始以安輿迎養會大吏以節孝聞於

朝得旨旌表又以覃恩先後膺誥命吾母安之客至必問所與游何人半日離寢門卽詢所往延塾師課孫館餐必豐潔待僕婢有恩然性極方嚴終身未嘗跛倚獨居必著裳夏月不單服子若孫雖盛暑不敢以短衣見也疾革不亂早餐畢歛容端坐而逝不孝依膝下四十有八年與吾母更相爲命不虞天之降割今乃長爲無母之人矣狀之言如此烏虜人子之痛其有涯乎太恭人就養吾平十餘年以禮法著稱元度昔爲文壽太恭人嘗以謂孔孟皆孤兒秉母訓卒爲聖賢願與時瑞交相勸近又申以婚媾知時瑞之賢有聞於時蓋得諸母教者豫也太恭人享壽七十子卽時瑞由教諭擢知縣晉同知直隸州以知府升用孫五人女孫

夫人葬以十年十一月六日墓在長沙沙坪奈家塲於灤宜銘銘
曰

烈烈女宗淵且塞忍死字孤完婦職歲寒不變貞松色有子而才
恢世澤翟茀烏頭彰厥德生七十年返元宅考終卜藏惟墨食山
宮水郭閔靈魄伐石鐫銘永不泐

故雲貴總督賀公繼配 誥封一品夫人陳氏墓誌銘

夫人姓陳氏善化人父諱鏞年逾笄歸同縣賀公諱長齡公繇甲
科起家官至兵部尙書都察院右都御史雲貴總督夫人來歸時
公官江寧布政使姑嚴太夫人老不能就養亡何病夫人隨公請
急歸則考終已半月矣夫人終身以不逮事舅姑爲憾遇忌日祭
必泣下旣而公起閩藩晉黔撫擢督雲貴夫人綜內政禮法秩然
筵室三不命之坐不敢坐而恩誼肫洽畢生無詬諍聲公得壹意
治官事無內顧憂繫夫人力也公薨後夫人教嗣子詒令口授諸
經動必以禮天性好施與羅某者公撫黔時義學生也以雜職需
次湖南尋卒夫人任殯葬且恤其家湖北張某宦湘中父子相繼

歿其妻踵門泣訴夫人立出三十金俾歸其二喪道光己酉歲大
稔蠲錢千緡助振咸豐壬子粵寇犯長沙輸金千餘助城工費戚
族中待以舉火者凡數輩遇婚喪皆有賻贈從孫某貧不能自存
月餼之其妻不爲夫所容又別贍焉公有從弟某因責負脫身走
京師未幾卒夫人代償千餘金幾以自累蓋自稱貸中來也其他
修學宮祠廟治橋渡施藥餌並輸仗無恹色家廟舊章入庠序躋
甲科者獎以金夫人令倍之勗後進也然自奉極清約自言一狐
裘垂四十年其諸厚施而嗇於自養者邪烏虜讀詩至鵲巢采蘋
諸什見古公侯卿大夫妻能竭誠惻奉祭祀以佐勉其君子王道
賴以成焉夫人於相夫逮下外益以慷慨樂施濟其尤可風也已

夫人終於同治十三年某月日壽六十有幾子二長某殤次卽詒
令以公弟丹麓公之第四子爲後咸豐七年副貢候選內閣中書
先卒女子二長適某官固始吳元禧前夫人徐氏出次適戶部郎
中一等侯湘鄉曾紀澤筵室陳宜人出孫二女孫三曾孫二曾女
孫三以某年月日卜葬某山之原銘曰

猗嗟夫人柔惠且直爲婦爲母莫不法式其式維何休有令聞曰
相夫子爲國盡臣嗣子也才辟叩躬教諸孫誥誥厥聲彌劭河潤
九里施及族嫺窈其爲德藹其爲仁有嶸者阡納銘幽隧傳千萬
禋以彰休懿

江西布政使李君原配 誥封夫人周氏墓誌銘

夫人姓周氏諱懋儀字佩芳長沙人故杭嘉湖兵備道諱克開之
曾孫蘇州府知府諱有聲之孫大理寺少卿諱鳴鑾之女年十七
歸湘陰李氏爲江西承宣布政使桓之妻太子太保兩江總督諡
文恭之介婦初文恭督廣東學政歸道安陸大理方守郡見承宣
才之字以女越四年來歸時君姑郭太夫人卒數年矣夫人事王
姑陳太夫人孝且謹凡十四年無一昔違左右文恭薨承宣以任
子 特用江西道夫人侍王姑不克從勸承宣置妾明年陳太夫
人卒夫人哀毀欲身殉聞細辛多服能殺人密購茹之暈絕一晝
夜髣髴見陳太夫人擊以杖趨使歸汗出如雨乃蘇不食又數日

人無知者踰年赴江西官舍偶告承宣承宣敬異之居二年感疾卒咸豐八年十月七日也春秋三十有二初封恭人贈夫人生子曰輔耀出後兄公編修杭時止一子無難色以編修固大宗也卒後帑月側室畢孺人生子輔焯夫人不及見矣女子子七夫人出者五其二畢出也夫人生長貴富家謹禮法讀書識大義能詩而其篤孝及惠能逮下尤爲人所難葬長沙縣西華山塘之原承宣書生卒歲月鏤資贊納諸壙後十有二年屬平江李元度爲之銘銘曰

潭州右族其著維周仍世通華簪黻延麻是生夫人令聞亶亶未笄來嬪曰隴西李太保之婦方伯之妻門閥相當有煒其儀逮事

王姑終順且敬孺慕攀號矢以身殉生子出腹以嗣大宗恩逮媵
侍樛木斯螽文駟雕軒來居官閣命服在躬承祀有恪胡天不弔
豐德嗇年芳蘭乍萎奔月其仙惠問川流式是彤史鏤銘幽隧我
言非侈

畢孺人墓誌銘

同治八年十二月李承宣桓以書來告曰側室畢孺人以今年三月八日卒年二十有九將以明年三月十二日葬長沙縣西華山塘原配周夫人瑩右方病革某許以祔葬稱善者再蓋至死不忘故女君也子爲我銘其幽又曰畢氏江都人生七歲父賈於江西客死母貧甚鬻女於陶氏陶有女少寡嘉其貞靜女畜之咸豐五年某以特用道發江西先大母陳太夫人年八十有二矣非周夫人侍養輒不樂夫人自請留侍勸某納簞室蓋夫人生長子輔燿卽以後伯兄時故未有子也明年正月納孺人年十有六是年夏陳太夫人棄養十二月周夫人來官舍孺人事之謹曲得其驩

心夫人亦女畜之暇輒教之識字明年生女又明年生子輔焯其孕也適夫人病劇治藥俱必躬親夫人慮以勞損娠也固止之不可迨輔焯生夫人不及見矣逾年繼室姚夫人來歸事姚如其事周然慟先女君甚雖抱子時有感容某引疾歸之三年病暴下血幾殆孺人憂恐墮其娠遂以成疾至是竟不起悲哉孺人性靜穆終日無語笑聲遇讌會輒辭以疾尤精女紅事某凡十四年無違色其病中情況與周夫人無少異以輔焯議敘詹事府主簿例封孺人女子子三長字善化周聲祥次未字次殤承宣之書略如此烏虜孺人可謂能循禮矣法當銘迺爲銘曰

女而士無違禮誦江汜廣葛藟年尙綺蹶然止有令子爲不死揚

徽美光彤史吁嗟燿兮

天岳山館文鈔卷二十二

旌表節孝 封太宜人郭母周氏墓誌銘

清故江蘇金山縣知縣湘潭周公諱世宅之女孫國子生諱系培
之女子生有淑德年二十三歸同縣進士郭公諱如翰是年進士
君補弟子員明年爲道光初元舉鄉試又明年成進士又三年卒
慟絕矢身殉以子新模生甫四閱月忍死撫孤越二十三年大吏
上其節行於 朝得 旨旌表又十年新模由縣學生發仕江西
以同知補用得 封太宜人至同治九年六月二十九日考終里
第壽七十有三蓋守節四十六年矣郭氏湘中右族舅諱汪燦以
名進士官鄆縣知縣舅之姑姊妹女子皆工詩女爲湘陰李文

恭公夫人輯湘潭郭氏閨秀集行世太宜人濡染內外家學詩尤工與進士君唱和著吟竹軒合稿進士君卒後七年鄂縣公亦棄養家中落太宜人撝荼茹蘗親課其孤讀依母族以居凡十年始返舊廬粵寇起仍避地母家又數年乃定居排頭嶺新樸客江西時家無壯丁遇風雨夕輒手一編坐達旦遍讀廿三史遇節烈事手書成帙間繪花鳥草蟲栩栩有生趣好談湘南故家及乾嘉間遺事晚歲以喪子婦冢孫婦又殤其女孫感傷得疾卒之夕神志灑然烏虜太宜人蓋節與才兼者也三代上論節烈於詩僅得共姜於春秋得宋伯姬紀叔姬何其少也而共姜賦柏舟爲節女所作詩尤少之少者後世惟陶嬰黃鵠歌差足趾美太宜人殆棄

之矣。以某年月日葬某山之原子。一卽新模女適文恭長子編修
杭亦能詩。著有紅薇吟稿。早卒。孫三女。孫存者一。銘曰。

善無不報。惟節可券。始枯終苑。彼蒼用勸。節也而才。古尤尠。觀衛
共姜外。曷云多。又烈烈宜人。有耀其儀。克相夫子。綺年甲科。中道
棄捐。飲冰自矢。乃翼乃字。乃迪厥子。揚風挖雅。餘事爲之。於祭
醴。節受福則宜。栖神元宅。伐石銘幽。以傳其詩。以配柏舟。

旌表貞烈 敕建專祠謝貞烈婦彭氏墓誌銘

貞烈婦姓彭氏長沙人祖諱永思進士戶部員外郎父申甫舉人
候選通判年十六歸湘鄉謝嗣純嗣純曾祖諱振定進士官御史
祖諱興恒安溪縣知縣父諱邦鑑進士官高瀆縣知縣初高瀆君與
通判君善以女妻其仲子既高瀆卒官僑家省會通判君復以第
四女字嗣純嗣純年十二櫻疾不通人事及婚不能成夫婦禮疾
作目上視輒箠擊人彭安之貞守八年無怨色事姑俞繼祖姑吳
皆孝且謹姑病暴下侍湯藥嘗五十餘晝夜不交睫中帟皆手滌
之同治八年正月繼祖姑病瘖彭與其姑迭侍閱兩月未瘳功服
夫兄嗣遠獸而冠者也三月二十七日來問疾留宿外廂是夕彭

感寒疾歸臥寢室漏四下嗣遠穴門入攀其帳彭驚呼嗣遠遁憤甚自經於床姑救之泣曰吾一婦人男子夜入室不死何以自明姑曰宜告知母家不則寃誰與雪會大水召母氏未卽至彭絕粒數日姑強之稍進溢米又自經以救免四月十六日乃歸甯哭訴諸父母揭布衫以示襟上淚皆血殷徑尺許詰旦拜辭家廟又遍拜家人與訣兄樹森煊送之歸將以是夕死姑欲誘擒罪人戒少待越日未至泣曰吾不能待矣姑曰卽死寃何從雪乃口授愬詞屬樹森書書竟令誦誦竟刺左手指摹血其上曰以是白諸官又明日嗣遠至彭裂膚怒詈手剪刀出刺其頭若臂流血被面又入厨取刀誓手刃之眾力止當是時嗣遠無人色姑命縛送縣彭曰

吾目瞶矣乃剪髮解佩玉授其夫哭與訣夫不省遂入室沐浴更衣出拜祖姑姑並拜其舅氏俞君請善視其病夫且爲立嗣尋入仰藥擲盞於地引鏡照又擲之有頃毒發蒙被臥昏瞶中屢切齒曰我誓殺此畜至次日復張目曰我不能終事兩世孀姑爲不孝又呼其兄曰我冤何得伸良久乃瞶三月二十四日昧爽也年二十有四未幾祖姑姑相繼卒嗣遠抵官卽引服越十數日自絞死長沙令某慮以疏防干議緩其獄居亡何令暴卒獄成巡撫侍郎聞於朝得旨旌表入祀節孝祠建坊如制總督尙書復采紳公揭以彭氏艱貞孝烈非尋常節婦比援案疏請敕建專祠制曰可都人士爲詩歌挽詞弔之者百數十人葬長沙馬龍山謝

氏祖塋右銘曰

白虹亘天天欲裂披髮上訴淚凝血骨性稜稜七尺鐵強暴就縛
冤憤雪一嗔不視完吾節

天子有詔褒貞烈崇祠專建森綽楔爲彼濁世雷聲潔掃麝成灰
桂成屑十二萬年香不滅

封光祿大夫胡公妻 封一品夫人陳氏墓誌銘

夫人姓陳氏益陽人嘉慶庚申舉人諱瓊及室李之次女年二十歸同縣 封光祿大夫道光乙未副榜舉人胡公諱達潛胡氏在大湖以南最稱有家法君舅 贈光祿大夫鄉賢公諱顯韶以學行甄其子姓有子四曰少詹公達源教授公達澍文學公達灝季則副舉公也夫人來歸時舅及繼姑劉太夫人並在堂劉性嚴急小拂意輒訶斥或令跪階庭不命之起不敢起夫人益承順無後言時大功同財合爨近于指內外各修其業夫人與諸妯氏分任井臼主中饋藹如秩如四十年一日也自少詹公 賜及第起家教授暨副舉公先後預鄉薦寢熾以昌至少詹子文忠公林翼由

甲第歷封圻爲時名臣胡氏益大顯夫人晚歲境日豐累封極品願獨甘儉穀卻紉綺金玉弗御惟濟急周貧窶輒罄所藏道光己酉饑自啖豆粥節食舖餓者遇舅姑生辰諱日雖老必手薦蔬繫拜獻如禮其治家於出入之盈縮工作之勤惰綜理弗遺尤難者在割私愛以全大義初文學公無子副舉公以次子架翼爲之嗣尋卒亡河文學疾革將屬纊瞠目欲有言夫人察其隱立請於副舉公復以季子棐翼後之文學含笑而瞑其後長子保翼官黔中丁寇亂慮貽親憂將乞退夫人屢勸以報國忘家尋以積勞卒官賜恤廕如例棐翼又以長子子勛爲文忠公後詔賞舉人襲男爵皆秉夫人教也夫人卒後副舉公六年是爲光緒元年

十月十六日壽八十有五子三長卽保翼由諸生保知縣加六品服賞戴藍翎權貴州仁懷縣事贈同知次舉翼次斐翼附貢生本班前補用知府並出嗣世父承重孫之隅廕生候銓縣丞孫女一人曾孫一人以二年正月某日葬縣境泉交河之留山洲兩昌山銘曰

猗嗟夫人秉禮察倫肫肫其仁惟敬斯順惟勤斯慎不隕厥問兩嗣兄公俾亢其宗匪私厥躬家範孔飭有床盈笏魚軒翟芾棄養而仙有嘖者阡銘徵萬年

故總兵麻公繼配 晉封一品夫人宋氏墓誌銘

光緒二年春正月癸巳朔越九日壬寅

誥封一品夫人麻母宋太夫人考終湖南平江縣署之內寢壽八十有六時少子維緒以特用知府補用同知爲平江縣知縣具狀屬部民李元度爲誌銘掩諸幽按狀夫人姓宋氏廣西宣化人上思營守備諱輔朝之女歸 誥授建威將軍臨桂麻公諱國慶爲繼室公之考諱允光由武舉官宣化鎮標守備嘉慶初征教匪陳亡 賜卹典 予雲騎尉世職公由諸生襲職除大城營守備歷竹山協都司永州營游擊宜章營叅將衡州協副將升用總兵兩權永州鎮爲時名將公蒞官夫人皆從治事井井能使公無內顧

憂道光末公以母憂歸遂請老嶺西盜起命子維紀學謙維綱治鄉兵捍賊亡何學謙維綱陳歿維紀以勞卒於軍夫人雖慟甚又以諸子死綏報國能不辱其先為慰也建威公卒後維緒由鄉舉入官權知宜章平江善化湘潭桃源諸縣事補平江夫人諄諄以仁明勤儉為訓在宜章有村婦愬其子不孝將案之夫人急召入誠曰而不聞房景伯之母與民婦對榻共食事乎此曹未聞禮教不足責也乃以倫理誨化之母子皆感泣去其能識大體多類此夫人在室以賢聞及為麻氏婦事君姑惟孝主祭饋接築里能敬以和其為母也以忠義循良勸其子視前室子如已出兩從孫失怙恃皆撫以成立所得誥命自宜人恭人淑人累封一品

夫人食祿四十年。享子之祿。養又十餘年。烏虜可謂完名全德也。
己子五。長學敏。前夫人張氏出。次維紀。右江營守備。卽補都司。
賞戴花翎。學謙。候補外委。賞戴藍翎。卹贈雲騎尉。維綱。候補
千總。賞戴藍翎。卹贈雲騎尉。維緒。咸豐六年舉人。歷今職。
賞戴花翎。皆夫人出。女子二。適武舉白玉珂。國子生翁炳奎。孫六
人。女孫五人。曾孫男女各三人。卽以其年某月。歸葬臨桂某山之
原。銘曰。

麻於嶺嶠。累葉將家。桓桓建威。專闔樹牙。夫人相之。厥德柔嘉。有
五男子。三歿王事。匪惟効忠。抑成先志。卹祀有光。賞延於世。偉與
季子。起家以文。屢最赤緊。休聲遠聞。惟古羅國。再迓神君。板輿頻

來福我黔首。每問平反餐。加雋母官舍。考終令名上壽。素車返葬。桂管之原。鏤石奠幽。我銘弗諼。文通武達。益振清門。

陳少陶之母劉孺人墓誌銘

孺人劉氏平江處士珍先之長女太學生陳公某之室同治癸酉
舉人晉熙之母也敏於德嫻於禮自其幼時治組紉織紝其保姆
皆曰不學以能其儕輩皆曰巧不可逮及其歸陳也以事處士之
孝事其君舅君姑逮其王舅王姑王舅喜得賢孫婦也曰吾門得
此婦內事不憂失時矣孺人治家有法度事姑之黨如姑禮事夫
及夫之黨皆敬以和眎叔姒如同母眎子之黨如其子夫兄弟七
人內外男婦近四百指尊者皆愛輩者皆附卑幼者皆慕之居恆
寸絲粒米必珍護及推以濟貧乏無所恡年且老猶手木棉或辟
纒不輟勸少休則舉敬姜之言以謝既歿織所遺爲布累月不能

盡太學君嘗怒一佃將更之孺人陰依以穀事遂解既病或以禱請力拒之其勤惠有定識皆類此子二德照後孺人八年卒次卽晉熙生最晚甫能言教之識字指楹帖示之棗机爲臺使就視捉掌畫波磔及就傅教之齒讓晉熙遂以學行聞於時孺人卒於咸豐十年三月十六日壽七十有二女子二人孫五人女孫如孫之數曾孫一人葬晉坑馬船洞以同治十三年四月啟攢納銘於幽隧銘曰

猗嗟孺人休有令聞厥初在室孝恪惠溫乃及於行克婉義門肅其爲禮煦其爲仁不歉於約不矜於盈不圓其方不晦其明是生令子以世厥聲母兮懿萬閭久逾新有或不信來徵斯銘

贈通奉大夫方公妻 贈夫人李氏墓誌銘

夫人李氏平江處士萬鳳公女年十九歸同縣 贈通奉大夫方公儒興逮事君舅君姑能先意承志通奉公昆季五其兩尊人以孝弟力田起家夫人和於妯娌視從子猶子躬親汲飪衣非數澣緝弗易室靡棄物家無閒人業以隆隆起通奉公性嚴急夫人佐之以和以是尊者喜輩者附臧獲忤甬胥懷之生子五曰宗光國子生 封四品階宗瀾同知銜宗規游擊銜宗彥國子生 封二品階宗尙同知銜加五級女一適吳炳望孫二十二人半注仕籍夢齡入縣庠曾孫十一人夫人終於同治三年正月十一日壽七十有二葬邵陽杉木橋丙首壬趾兼已亥越十有一年宗光等鏤

石隧道來徵銘予讀詩見古公侯卿大夫開國承家多本於內德見諸雅頌者若有妣方將時維姜嫄爰及姜女思齋太任纘女維莘皆是也國固有之家亦惟然蓋所就有大小道則一爾夫人爲婦爲母皆有法式又能以儉勤修業而息之卒亢其宗絜受誥命於朝雖躋諸風雅之列何多讓哉法宜銘乃爲銘曰

業業崇山其下維谷地道有終夫人之淑其淑維何禮以型家燕山桂五萼附其華諸孫繩繩其實其葩詩書澤永茲始萌芽翟芴珈笄自

天有命匪私厥家惟德衍慶勒銘考施以揚懿行

旌表節孝 封太宜人馬母張宜人墓誌銘

太宜人姓張氏。新都人。處士諱中永之女。年十六歸。同縣馬又眉。贈公諱某。贈公故寒素。爲邑諸生。藉修脯養親。其尊人性好客。客至。趣設具。談讌窮日夕。太宜人主中饋。叱嗟立辦。力不繼。則質釵珥。治鍼膏。佐之。二十年無倦色。姑高宜人。病半體枯。轉側需扶掖。太宜人奉匱進饌。能以目聽。以神喻。暇則緦姑於背。以媪姑。幾忘其疾。臨終。執太宜人手曰。若事我良苦。願若得賢子孫。以償若孝。語畢。遂瞑。太宜人一子雲生。數歲。贈公遽卒。易簀時。以未終。養爲憾。太宜人痛幾絕。以親老子幼。強起視息。而課子讀。尤嚴。初雲性跼弛。失愛於諸父。旣孤。遂析爨。太宜人攜雲異居家。貧甚。盡使之。

樵夜則課以讀。注膏於盞。膏不罄。讀不輟。書聲與紡織聲相響。答也。亡何粵寇踞吳會。雲甫冠。杖策從軍。奉湖北巡撫胡文忠檄。襄事黃梅。以功署縣丞事。咸豐七年。括祿入所餘。走伴遺母。藉供絮。白之養。書至。諸母走相慰。太宜人慄使者曰。汝主出門時。不名一錢。吾聞軍中餉絀。戰士枵腹執戈。此金何自來。吾老矣。願兒爲清白吏。異日可見乃祖。乃父於地下。速將去。無以金爲也。諸母爲緩頰。乃以書付使者。命雲歷數所自。以聞。雲得書。徧示坐上客。咸驚嘆。以謂有還魚封鮓之風。雲旋歸省。復從戎秦晉間。累功保知縣。畱湖南補用。加同知銜。封父祖如其階。於是太宜人得五花之誥。同治四年再歸省。邦人士以太宜人節孝。應旌法上其狀。大府

以聞得 旨旌表如例居數月無疾而卒是年某月日也享年五十有七光緒二年秋雲將歸里改葬太宜人於某山屬元度爲之銘銘曰

功利之毒痼人膏肓畔授歆羨云何克臧士夫波靡况彼閭房烈烈宜人高節孔彰少歷艱貞冰蘖飫嘗晚躋蔗境初志弗忘子以俸進揮出門牆誠子一書大義雷殛坤德至柔其動也剛宜膺旌典綽楔垂芳我銘幽竈閱久逾光

房姪女雪梅墓誌銘

房姪女雪梅房兄擴湖長女也。兄諱原潛道光己酉拔貢臨武學教諭卽選知縣加五品銜繼娶余氏生子女各二咸豐乙卯擴湖殉節通城子積楨年十一歲積樾六歲姪女年裁八歲內奉孀母百計解其憂外撫諸弟妹曲有恩誼越八年積楨補弟子員明年以疾卒嫂氏益慟姪女扶掖寬譬之忍淚強言笑嫂氏無此女蓋不能一息安也姪女幼多病長而溫惠無疾言遽色年二十歸同邑封通奉大夫方公宗彥長子國子生訓杰上事王舅及君舅君姑皆能先事而承其意方氏故以孝弟力田起家其太公有子五孫曾林立食指近千男婦各勤其業自吾姪女入門尊者皆懌

輩者皆愉門以內無間言時太公年八十矣於諸孫婦中獨鍾愛
吾姪女每手治羹湯輒甘之爲加餐飯晚歲病不肯服藥餌姪女
手進之則一飲輒盡病革顧而諭之曰若賢孝必大吾門矣姪女
生子蔭賢踰年再生子殤又踰年生女殤以是鬱鬱成疾卒同治
十二年三月某日也距其生道光二十八年八月二十四日春秋
二十有六其舅姑大慟曰天乃不使吾有此賢婦邪吾老人言竟
不驗邪自後諸娣姒以次入門然每遇事姑輒流涕曰吾雪梅在
吾無容心矣其歿而見思若此光緒二年其舅斥重金購吉壤曰
蟬形在居宅後某山某向將改葬介積樾來徵銘迺銘曰
生淑慎兮無違繫忠養兮奉重聞宜壽昌兮中道而萎餘微不沫

兮貽親思銘以永之兮用塞其悲

贈通奉大夫故訓導鄧公妻 贈夫人陳氏墓誌銘

鄧夫人陳氏新寧人 贈榮祿大夫縣學生諱定魁之女布政使
銜江西候補道明志之姑 贈通奉大夫候選訓導 賜卹典樹
堃之妻鹽運使銜貴州升用道候補知府在鏞之母也夫人性穎
特讀書止半年經史百家一見輒通其義年十九歸訓導公事舅
姑盡禮舅築新居於雙柳井工作繁重命夫人綜出納條理秩然
訓導公偶作書簡方構思未就夫人引管代成之語公曰使妾易
笄而冠取青紫猶拾芥耳公以是益奮於學爲名諸生儼二十人
中亡何雷再浩反訓導與江忠烈公共治鄉兵討擒之明年李沅
發反既陷城分黨掠訓導家夫人謂公曰事急矣君速奉父母出

走無以妾母子爲念有不測必以死報君哭而別公倉猝扶二親
避地益溪村而躬集鄉兵進規縣城夫人挈二子及叔姪母女賃
敝舟冒死出白公渡將趨郡城時兩岸賊如織夜泊石幕同泊百
餘艘皆避難男婦也有頃夫人趣解纜舟人有難色固命之維解
而賊虜至旁舟皆被掠惟夫人得達郡城當是時訓導帥民兵復
縣城追賊至嶺西懷遠縣境戰死於野毛坪夫人回里凶問至屢
慟絕以子女幼忍死字孤自是課二子讀益嚴隆冬盛暑不少貸
卒以衰毀得咯血疾時或夢中驚起哭失聲越四年病革出訓于
篇臚在鏞等述訓導公行誼及死事狀以忠孝勉其子並及讀書
持身之要凡七百六十言遂終於雙柳井宅咸豐四年八月晦日

也春秋四十夫人考終後在鋪隸縣庠從戎積功至今官 覃恩
贈母爲夫人又爲訓導公請 卹典得

旨報可眾謂鄧氏有子矣夫人好學卷未嘗釋手工詩不存稿不
出以示人以燬於兵燹僅存寄外一章生平仁恕好施論事有卓
識懿行不勝書亦不必具書蓋凡深明大誼者未有或忽於細行
者也夫人墓在某山之陽予旣銘訓導公矣故於其家世子女不
重述銘曰

烏虜是爲忠臣婦盡臣母脫虎口正狐首墓在茲邱爲不朽其生
也相夫君奉姑舅訓子有文外孫齋曰有子而才金章紫綬我銘
其幽與金石並壽距夫人卒時蓋二十四年之久時在光緒三年

太歲丁丑夏六月癸酉

贈孺人適黃氏姑母墓誌銘

姑母姓李氏。誥贈光祿大夫縣學生諱自芳。贈一品夫人余

氏之女孫。誥贈光祿大夫從九品銜諱家庚。贈一品夫人徐

氏之女。姑母賢且孝。大父母鍾愛之。及笄。適同縣黃公諱德敦。

例貢生諱修誠長子也。公失愛於後母。有閔子騫尹伯奇之遇。姑

母雖孝謹。後姑弗善也。遇事苛虐之。大父母憂念之。不置。每歸寧。

問所苦。姑母堅諱不言。生子四女。一拮据無寧。日遂積勞得疾。日

用所需。大母數遣俸贖給之。姑母輒報謝曰。兒生事差。自給母勞。

繼粟肉也。先世父既早卒。先君踰冠入郡學。明年遽卒。大父母哭。

之。幾喪明。當是時。姑母攜子女歸。暗相嚮而哭。元度方四歲。亦隨。

吾母哭今五十餘年縷縷猶昨日事也亡何姑母亦卒訃至眾慮大母慟不可生遂諱之每速歸則詭詞以謝大母將屬纊口誦誦念阿女冀一握手訣大父泣告之曰女下世七年矣慮若盡傷故不以告也大母搖首淚如雨乃瞑自姑母卒姑丈益不容於後母出居山莊尋徙官路橋新宅少能文坐是絕意進取以從九品注籍 贈姑母爲孺人子益康軍功卽選主簿益慶從九銜議敘國子監典籍益庭卽選巡檢益廣卽補千總女子子適彭氏蚤寡以節孝被 旌孫五人次崇榜縣學生姑母子姓並熾昌崇榜尤能繼未竟之志至是人益念姑母賢而惜其享年不永云姑母卒道光八年正月二十八日春秋三十有九葬洪家墩嶰形越五十有

一年益康等修治墓道乃屬元度爲之銘補納諸幽銘曰
嗟母生而震愆兮罹百憂以煩煎操履霜而齋志兮慨生世之弗
延·恡·歔·歔·余·鬱·邑·兮·幸·償·以·後·祚·之·綿·綿·母·今·不·可·作·兮·戚·里·猶
眾·載·其·賢·我·銘·以·彰·徹·兮·壽·茲·阡·於·萬·億·年·

旌表節孝 封太恭人凌母解恭人墓誌銘

光緒六年八月丁酉朔越六日壬寅 旌表節孝 誥封太恭人
凌母解恭人考終長沙里第春秋六十有九其子江蘇卽補道蔭
廷方從軍山西總理湘淮營務處兼統領湘毅營聞赴慟不欲生
星奔抵里門卜以十一月壬辰葬縣南之某山具狀乞爲誌銘且
先以書書略曰某不幸生四歲而孤又鮮兄弟母子相依爲命某
幼善病母謁醫禱神無虛日及長貧不能從師太恭人親課之尤
諄諄以存心爲訓某因於左臂刺存心二字以自勸道光己酉歲
大饑太恭人節食哺餓者已而貧益甚咸豐甲寅某投筆從戎爲
謀養計受知曾文正及宮保曾公彭公先後檄領水陸軍馳驅江

皖時太恭人尙健竭力措門戶蒙文正公疏請賞封典膺誥命爲宜人洎辛酉得疾某方從攻安慶城拔始受代歸時已浣保花翎江蘇卽補道奉特旨晉封太恭人然以思子故至神情恍惚某自是不敢遠離矣同治癸亥文正公檄赴吉安治釐稅軍火某迎養不欲行明年母疾某卽乞歸會縣紳公上其節行於大府疏請旌表建坊制曰可時病亦漸瘳丙寅某奉檄總辦衡州淮鹽局不數月母復病仍致事歸自是數門侍養者十一年以食指日繁貧日甚至戊寅春遂有甘隴之行奉左相侯檄赴新甯治庫車善後事宜去家萬里明年又聞母疾乞假歸歸而獲愈奉宮保曾公檄調赴晉充營務處會宮保督師山海關檄某統領西晉

之湘毅兩營某乞歸不許擬秋末乞代至九月三日而赴至吳大
府批牘慰留請乃得歸葬悲哉不孝明知母之不可離而竟不
能不離明知奔喪不可緩而已不能無緩天乎人乎殆無地自容
矣其言至深痛不可讀然而忠孝大倫也移忠以作孝非無故違
其親也王事靡盬不遑將母自古歎之矣太恭人母子其何憾焉
太恭人姓解氏贈文林郎某公之女兄灑官江西某縣知縣母某
人早卒繼母育之父病痺痿動止須扶掖太恭人先意承志十
餘年如一日及歸 贈中憲大夫智泉公事舅姑能竭忠養智泉
以劬學成疾數顯天乞躬代不起幾以身殉撫藐孤成立歷今官
有孫六人女孫幾人墓係某山某向銘曰

女而士輝彤史喪所天宇厥子于嗟煒兮子也才德不回擁多節
策龍媒于嗟瓌兮 詔旌節森綽楔荷 褒綸表馨潔于嗟傑兮
于從王風木傷星奔葬銘厥藏于嗟昌兮

誥封宜人適彭氏次女墓銘

附君舅履史所撰誌

長男樹森舉同治甲子鄉試官刑部廣西司主事婦李氏偕之官以光緒元年十月行六年正月得家書婦病革舉室惶駭卜禱無晷刻暇余方應平江天岳書院聘惘惘登程不數日又得報則婦以五年十二月二十日死矣發書長號門弟子廡集慰問余益悲旬日爲詩弔之門人有以逾禮來規者告之曰家之盛衰視子婦之賢否婦賢而才一旦溘逝余家曷由振乎曰請問其略曰婦人無遂事蘋蘩盟饋所難者誠敬耳婦歸二十有二年無毫髮可議初來年才十有七時太恭人在堂春秋九十有二隨侍得懼心及見舉子恆期以後福處少姑叔姒姊妹

和婉盡禮督家政十年滅嫗罔不效命米鹽凌樛綜理悉當自去京師而代者蹙蹙矣嘗送阿妹至閩沈文肅夫人亟稱之都中同官命婦胥則之此非余私言也門人唯而退夏四月柩航海歸余拊之慟女孫道臨訣預期時日誠語尤不忍聞嗚呼其習於女範者邪婦生道光壬寅正月初八日年三十有八生子瑞清彝清仲男樹炳歿於京邸出葬清嗣之婦志也女四人孫濂端歿時皆在側以六年九月二十六日葬邑清泰都石鼓流之石板潭頂子趾午樹森乞余誌余以其父古於文更請爲之銘乃銘曰

來兮其何所自兮去兮其何所逝兮生三十八年身如寄兮其靈

根至性固當閱千劫而不昧兮爲女爲婦爲母家事罔不治兮成
夫子之志兮出愛子爲弟嗣兮晚爲大母抱孫以自慰兮隨夫宦
轍倏蹶焉而委蛻兮卜葬斯邱君舅誌其隧兮我銘以寫哀不知
爲墨爲淚兮岸谷海桑誌若銘其終不駢兮

誥封太夫人陳母李太夫人墓碑銘

光緒二年秋九月戊午朔越七日甲子陳母李太夫人壽終湖南
行省之寓邸享年七十有八越明年某月某甲子葬義寧接壤平
江縣屬之金坪癸首丁趾又二年十月某甲子立碑隧道長子樹
年季子寶箴具狀屬元度爲之銘按狀太夫人姓李氏義寧州人
處士諱大嶸之女年未笄歸 贈資政大夫諱某事舅姑能聽其
意姑先卒事舅最久贈公遇有故當外出恆依依不忍去太公則
慰諭之曰第去無慮家有孝婦不至憂晨夕也太夫人訓子嚴非
聖之書不使寓目待婢媪曲有恩詎贈公嘗從容語其子女曰先
儒謂凡事肯設身處其地是第一種學問汝母殆近之矣咸豐元

年寶箴舉於鄉會寇亂未卽與計偕而贈公以團結義勇衛鄉里積勞成疾卒太夫人命二子出繼志事治軍旅勛以忠義累書止其歸卒以是顯聞當世家勵中人產居恆儉而有制歲常得羨餘推以周貧乏潤及三黨而治先壟修祀事必恪必豐性不喜被紉綺聽音樂七十初度諸子擬稱觴爲壽不許命節所費爲里中勸社倉積粟平糶汔今利賴之寶箴以守巡道需次湖南迎養來湘每歲生辰輒命謝客以百金市楮衣施會城丐者歲以爲常光緒初元寶箴備兵辰沅治在鳳凰廳爲楚邊重鎮地險瘠而民貧沱江水遶城下爲灘石所齧弗利舟行百物翔貴太夫人命竭廉俸疏鑿之七閱月工竣瀕行猶命蠲金數百爲善後資烏摩古稱婦

德之懋孝於親慈於子姓誠敬於祭祀已爾太夫人獨能勸其子興巖。亶百世之利古女士所未聞也。先是曾文正公薨於位。太夫人聞之垂涕絜歆不憚者數日。及居長沙聞

穆宗皇帝哀詔哭至失聲。率家人縞素如禮。此尤能見其大抑可徵其性情之獨摯已。子三人樹年藍翎候選同知。次觀瑞。早世。次寶箴。絲舉人。歷今官加二品銜。賜戴孔雀翎。女幾人。適某某孫四人。曾孫一人。銘曰。

昔宋歐陽母夫人鄭氣節文章甄于荻訓。瀧岡一表餘八百年。今陳母李殆庶幾焉。母生右族曰嬪于陳。巽以靖夫恪以愉親。有偉者識能見其鉅粵盜陸梁家興義旅夫也。執爰勤事以死。有子而

才世稱國士。國有相侯。長城是依。母軫其亡。咨齋涕洟。鼎湖龍
去。溥海攀號。母也哭臨。憂心切切。凡茲大誼。匪期中愴。天質特優。
是爲粹德。季子持節。竦楚苗疆。城河墮石。莫駛舩航。母括私錢。命
加醢鑿。干艘銜尾。頌聲不作。歌眾母母。墜擘祝延。遐不黃耆。棄養
而仙。嶮彼道巖。分寧接壤。樂哉斯邱。穹碑十丈。我銘維實。傳萬億
年。以章慈懿。以繼瀧阡。